

欽  
定  
全  
唐  
文

欽定全唐文卷五十六目錄

新文藝出版社藏書

憲宗

一

貶王伍開州司馬王叔文渝州司戶參軍制

授鄭餘慶平章事制

貶韋執誼崖州司馬制

授鄭絀中書侍郎平章事制

討劉闢制

試制科舉人制

封真寧公主等制

封鄧王等制

授高崇文劔南西川節度使制

儲穀制

授杜黃裳河中晉絳慈隰節度使制

授李吉甫中書侍郎同平章事制

授武元衡門下侍郎平章事制

授武元衡西川節度使制

賑諸道水旱災制

授李藩門下侍郎平章事制

授李藩宏文館大學士制

命李晟家編附屬籍制

授烏重允河陽節度使制

復王承宗官爵制

授權德輿禮部尚書同平章事制

授李吉甫中書侍郎平章事制

李藩守太子詹事制

貸京畿義倉粟制

封恩王等女爲縣主制

授李絳中書侍郎同平章事制

欽定全唐文卷五十六

憲宗皇帝

帝諱純順宗長子大曆十三年生貞元四年六月封廣陵郡王名淳二十一年四月立爲皇太子改今名永貞元年八月即位元和三年正月上尊號曰睿聖文武皇帝十四年七月又上尊號曰元和聖文神武法天應道皇帝在位十六年年四十三諡曰聖神章武孝皇帝廟號憲宗加尊昭文章武大聖至仁孝皇帝

貶王伾開州司馬王叔文渝州司戶參軍制

銀青光祿大夫守散騎常侍翰林學士上柱國富陽縣開國男王伍將仕郎前守尚書戶部侍郎充度支及諸道鹽鐵轉運等副使賜紫金魚袋王叔文等夙以薄伎並參近署階緣際會遂洽恩榮驟居左掖之秩超贊中邦之賦曾不自厲以效其誠而乃漏泄密令張皇威福畜姦冒進黷貨彰聞跡其敗類載深驚歎夫去邪厝枉爲國之要懲惡勸善制政之先恭聞上皇之旨俾遠不仁之害宜從貶削猶示優容任可開州司馬員外置同正員叔文可守渝州司戶參軍員外置同正員並馳驛發遣

授鄭餘慶平章事制

有天下者曷嘗不選賢與能納於輔弼用又厥辟以和羣生所以敘彝倫平憲度建用皇極底乎雍熙者也朕祗若大訓圖任舊人疇咨庶工用佐予理朝議大夫守尚書左丞輕車都尉賜紫金魚袋鄭餘慶全器茂學蹈中秉直易則可久而不流嘗踐禁闈亦參袞職每盡王臣之節實彰君子之風服於大僚克有休聞洎綜理會府紀綱羣司率繇舊章協於成式固可以儀型庶尹寅亮天工可中書侍郎門下平章事餘並如故



貶韋執誼崖州司馬制

爲臣之道必在盡忠其有朋黨比周挾邪敗度事資懲戒  
必正典刑正議大夫中書侍郎同中書門下平章事崇文  
館大學士修國史賜紫金魚袋韋執誼幸以文藝久從任  
使早居禁署謬列鼎台直諒無聞奸回有素質恩棄德毀  
信廢忠言必矯誣動皆蒙蔽官由黨進政以賄成朕初臨  
萬邦務於宏大每存容恕冀有悛心而乃不顧憲章敢行  
欺罔宜投荒服以儆無良以祗事先朝嘗參近職尚寬極  
法俾佐遐藩可崖州司馬員外置同正員仍即馳驛發遣

授鄭絀中書侍郎平章事制

朝廷者天下之楨幹宰輔者王化之根源朕夙寤晨興講求爲理之本思所以仰承宗廟之重俯協億兆之心諧和陰陽茂育區宇以貞百度以敘九疇佐予成功實賴良弼具瞻之地公望攸歸朝議大夫守中書舍人翰林學士上柱國賜紫金魚袋鄭絀秉仁迪哲守約居易懿以文德擇乎中庸體元和之淑姿服大雅之明訓累登班序休有令聞羽儀周行黼藻王度洎發揮綸翰典職禁闈以溫文雅麗之才居獻納論思之地從容中節密勿盡規先朝任能

委遇斯重恪恭夙夜爰歷歲年誠節貫於屯夷茂勲參於  
顧託名書彝鼎心著丹青朕祗膺睿圖誕受明命宏宣大  
典澤潤鴻猷保乂於一人儀刑於萬國簡於朕志用選厥  
勞圖任舊人以輔乃辟疇咨四嶽罔不僉同宜膺弼亮之  
求式懋彌綸之績於戲爲君之難在乎舉而不任爲臣之  
患在乎知而不言事舉其中政修其本永綏厥位時乃之  
休可中書侍郎同中書門下平章事兼集賢殿大學士散  
官勲賜如故

討劉闢制

劍南兩川疆界素定藩鎮守備各有區分頃因元臣薨謝鄰境不睦劉闢乃因虛構隙以忿結讎遂勞三軍兼害百姓朕志存含垢務欲安人遣使諭宣委以旄鉞如聞道路擁塞未息干戈輕肆攻圍擬圖吞併爲君之體義在勝殘命將興師蓋非獲已宜令山南西道節度使嚴礪領當道士馬與劍南東川節度使李康犄角應接仍令神策行營節度使高崇文領馬步五千人爲左軍左右神策京西行營兵馬使李元奕領馬步二千人爲次軍並相續繼發仍仰高崇文等各差人先與嚴礪計會齊進朕以三蜀之人

本無過犯征鎮將士各著勲勞迫於威制不能自拔各宜  
分明曉諭令悉朕懷如劉闢稟奉朝經抽兵却歸本鎮朕  
務存誠信必當委待如初其效順之誠臨鎮歸款高位重  
賞當不食言如尚執迷自貽覆滅法既無赦令在必行宜  
一乃心恭守所職其置頓糧料等仍委度支使差官勾當  
無令闕失

試制科舉人制

朕以寡薄獲奉睿圖嚴恭寅畏不敢暇逸永惟萬邦之廣  
庶務之殷而燭理未明體道未至思欲復三代之盛烈觀

十聖之耿光是用詳求正言思繼先志子大夫等藏器斯久賁然而來白駒就維洪鍾待扣膺茲獻納朕甚嘉之言觀國光宜有廷試本將詢事豈忘臨軒園邑有期營奉是切永言誠感未暇躬親爰命公相洎於鄉士親諭朕意延訪嘉謀至於興化之源才識攸重練達吏理詳明儒術當是三道副朕旁求意或開予靡有所隱條例所問畢志盡規當酌古而參今使文約而意備朕將親覽擇善而行並宜坐食食訖就試

封真寧公主等制

門下第二女等皆以柔懿備聞風訓知中闈內則之義稟  
傅姆女史之規禮有待年恩從廣愛徵於舊典俾洽䟽封  
式分湯賦之榮庶承肅雍之德宏我慶澤被於家邦可依  
前件

封鄧王等制

門下昔周室制法備建宗盟漢氏垂統畢封子弟其盛也  
二南教化首在國風其詳也九國土疆載於侯表朕嗣守  
丕業惟懷遠圖永言磐石之固宜本价人之重男平原郡  
王寧等孝友忠敬溫文惠和稟其樂善之姿強於好古之

學君親之教罔敢失墜保傅之言亦惟佩服由是寡悔至  
於通方庶可膺茲典章列是藩屏疏爵以冠於侯伯分茅  
以錫於山川用明至公且叶前訓平原郡王寧可封鄧王  
同安郡王寬可封澧王延安郡王宥可封遂王彭城郡王  
寮可封深王高密郡王寰可封洋王文安郡王寮可封絳  
王第十男審可封建王宜令有司擇日備禮冊命主者施  
行

授高崇文劔南西川節度使制

慶賞刑威所以爲國旣用鉞以誅有罪則建侯以報有功



懲綱紀於未然勸事君於已著歷考前載斯爲大章劔南  
東川節度副大使知節度事管内支度營田觀察處置靜  
戎軍等使開府儀同三司檢校兵部尚書使持節梓州諸  
軍事兼梓州刺史大中大夫上柱國渤海郡王高崇文爲  
時生材緯武成器抱厥沈斷確乎堅剛鷲隼挺凌厲之姿  
高秋凝肅殺之氣自築壇受命宜社徂征形義色以即戎  
憑忠誠而誓衆康衢以視其重阻怒心如報於私讎令踰  
風行勢輟電走殲凶邪於未障完危壁於將傾然後總無  
前之師搏猶鬪之獸仰斷飛鳥高橫戰鋒掩鬼神以用奇

越邱陵以制勝生致逆豎洞開金城引漢將之旗鼓見蜀  
川之父老貞以紀律弔其傷殘兵無亂行市不改肆上靖  
井絡下清岷江銘而篆之豈有慚德乃眷庸部其惟奧區  
畢功以除其禍災圖勞宜享其土地滌蕩汙俗純綏異行  
觀風勵韓黃之化按節修方召之任爰自六職俾登三司  
仍疏大封且賜珍食不踰次以彰殊伐不踰時以示休利  
敬服嘉命宏宣壯猷殿茲坤維屏我王室可檢校司空兼  
成都尹御史大夫充劔南西川節度副大使知節度事管  
內支度營田觀察處置統押近界諸蠻及西山八國兼雲

南安撫等使仍改封南平郡王食邑三千戶并實封三百戶

儲穀制

歲時有豐歉穀價有重輕將備水旱之虞在權聚散之術應天下州府每年所稅地丁數內宜十分取二分均充常平倉及義倉仍各逐穩便收貯以時出糶務在救人賑貸所宜速奏

授杜黃裳河中晉絳慈隰節度使制

昔周之周召出爲二伯是以宗公而領方任也鄭之桓武

入作三事是以諸侯而宰邦政也然則荷中外之寵享崇高之名不有盛德孰膺寵命金紫光祿大夫門下侍郎同中書門下平章事兼宏文館大學士充太微宮使上柱國南陽郡開國公杜黃裳道惟無方才則不器陋齷齪之廉謹本誠明而坦夷澄波納寬瑞玉凝素夙以令望更於達官議論必通於大經損益咸酌於中制代所準的朝之羽儀爰授樞衡俾居左右所緝者墜典所陳者格言色無面從志不枉撓宏茲冒遠之化啟彼夷凶之征將明則然忠利斯在惟股肱之郡有節制之師兵威外接於太原地形

內錯於左輔是用謀帥僉歸碩人籍台庭之素風執戎鉞以莅衆示以嚴重廣其封疆統平陽之十連賜元侯之四履超列鼎足仍參廟謨增二象之光輝濡一方之膏雨大邦雄屏羣后所瞻爾其敬哉無替舊績可檢校司空依前同中書門下平章事兼河中尹充河中晉絳慈隰等州節度支度營田觀察處置等使散官勲封如故

授李吉甫中書侍郎同平章事制

門下昔周宣王思宏文武之道則以申甫代天工漢宣帝思繼祖宗之風則以邴魏執邦柄是以克紹前烈俱稱中

興朕以眇身託於人上亦思所以繼列聖之緒致太階之  
平懷柔四夷親附百姓將成莫大之業遂獲非常之才授  
之鈞衡俾作舟楫銀青光祿大夫行中書舍人翰林學士  
上柱國李吉甫符彩外發清明內融體仁而溫抱義而峻  
識洞精蹟知皇王致理之由學該古今窮天人相與之際  
自擢於綸閣列在禁闈鼓三變之文潤色王度總五才之  
用參贊廟謨化俗思邁於成康致君願及於堯舜當注意  
之所向每罄心而必陳深中不回獨立無懼經綸常見其  
道遠激切多至於涕零王綱以張蜀寇斯殄左右密勿實

由嘉言降神而生輔朕爲理調三光以序六氣遂物情而  
熙帝猷是爲中樞司我大本命爾俞往其惟勗哉於戲宰  
相之任安危所繫百辟爲憲萬邦所瞻與其明察以爲公  
不若嚴重而有制與其將順於甚美不若匡救於纖違審  
涇渭以序人倫謹繩墨以正天下交泰之運其若斯乎敬  
聽朕言以踐乃職可守中書侍郎同中書門下平章事散  
官勲如故主者施行

授武元衡門下侍郎平章事制

惟人代工與物施化財成者元首輔翼者股肱況國之號

令本於內史政所關決審於黃樞爰發四方用寧庶績必  
求同德資以弼予朝議郎尚書戶部侍郎天水縣開國子  
賜緋魚袋武元衡挺生偉才克振前緒蹈禮合樂謙厚端  
和居暗室而不欺處巖廊而益重文能合雅吏必立程再  
司石室之圖遂踐春華之署故事可舉嘉猷日新爰委地  
征實爲邦本勤於小物宏以大綱一心不移於吐茹衆務  
必歸於領會鬱此時望稱爲名臣朕祇奉鴻休懼於負荷  
居則神明之隩位當億兆之尊常恐明不燭幽慮不及遠  
一物未獲萬方在予書不云乎臣作股肱耳目是用命爾



處茲弼諧爾其慎於將明勉於規誨必思袞闕無或面從  
直哉惟清副我明命可朝議大夫守門下侍郎平章事賜  
紫金魚袋封如故

授武元衡西川節度使制

地有西蜀國之奧區百濮羣蠻外匝於封域雙流重阻內  
固於襟帶形勝所屬統綏惟艱近者翦其凶魁鎮以勲力  
實有威惠至於和寧而匪遑寧居累布丹懇激戀闕之深  
志將執圭而展儀誰其尸之允在能者乃聽僉議輟茲台  
臣太中大夫守門下侍郎同中書門下平章事宏文館大

學士太微宮使兼戶部事上柱國蕭縣開國伯賜紫金魚  
袋武元衡器惟宏深行本端敬珪玉不琢雷風有恒夙彰  
嘉聞亟厯華貫乃司邦憲有遂物之誠乃踐地官有阜財  
之績益振公望克諧朕心擢於鼎司授以大柄謀由外而  
不伐慎由衷而自彰展代工之勤宏冒物之化以道則直  
以心則和丙吉雅通於國體山甫誠補於衮職朝夕有恪  
毗予一人眷茲西南憂寄方切非寬大無以莅衆非慈惠  
無以厚生非誠信無以撫蠻夷非忠賢無以殿邦國眷我  
心膺膺茲重任外分兵符以副於重望中佩相印不離於

具瞻峻秩爰首於六官崇階更登於七命且示加等仍疏  
大封勉承寵光無替朕命可銀青光祿大夫檢校吏部尚  
書兼門下侍郎同中書門下平章事成都尹充劔南西川  
節度使營田觀察處置統近界諸蠻及西山八國雲南安  
撫等使進封臨淮郡開國公食邑二千戶

賑諸道水旱災制

王者立國本以安人海隅蒼生不忘宏覆天下至廣咸務  
和寧其或郡國罹災存撫爲重發廩蠲賦時爲舊章獻歲  
布和前聖高躅朕祇膺眷命續承洪緒居兆人之上五載

於茲推大信以撫萬邦體至仁以蕃庶類夕惕惟厲憂深  
納隍豈布理猶鬱上帝未感精祲相盪陰陽或愆近者江  
淮之間水旱作沴縣亘郡邑自夏徂秋雖誠禱羣神無愛  
圭璧而災流下土虧我生成逋亡靡依凋瘵斯甚疲俗艱  
食時予之辜當宁疚懷宵衣興歎憫茲求瘼臨遣使臣分  
命巡行特加存恤往救災患冀安流庸俾免其田租賑以  
公廩隨便拯給惠此困窮其元和三年諸道應遭水旱所  
損州府應合放兩稅錢米等損四分已下宜準式處分四  
分已上者並準元和元年六月十八日勅文放免仍令中

書門下即於朝班中擇人分道存撫其有單貧乏戶轉徙未安便以常平義倉所貯斛斗量事賑貸務令存濟副朕憂軫嗚呼方岳長吏職居親人永言分憂亦惟善政敬哉有土咸悉予懷

授李藩門下侍郎平章事制

皇王理本繫於輔弼內以熙庶績釐百工外以撫四夷式羣后三五已降崇替繇之朕祗荷丕圖思底于道夙夜惟厲登延俊賢若涉大川俾作舟楫朝散大夫守給事中上柱國李藩天鍾粹美氣稟清英信在言前行爲人表蘊經

邦之識度發自明誠見理道之本根鬱爲公器學探旨奧  
文以忠貞大玉斯寶於東序朱紘可薦於清廟廣則難挹  
剛則有容處衆無溷其風標在險嘗推其名節累登華署  
克贊彌綸擢授左丞專聞駁議永惟股肱之任翼亮是資  
必求其人豈限常次黃樞選重僉曰宜之爰舉朝章式副  
公望於戲爾惟率正邪罔不懲惟匪躬直誠可以事上惟  
秉鈞平施可以致和毗予一人允理三事懋乃攸績永孚  
于休可朝議大夫守門下侍郎同中書門下平章事賜紫

金魚袋

授李藩宏文館大學士制

朕思欲恢宏大化登乎洽平翔聲朔於鬼區煥日月於黃  
道士網開而萬寓垂澤太階峻而百神受職叶於夢卜天  
其賚予朝議大夫守門下侍郎同中書門下平章事上柱  
國賜紫金魚袋李藩德宇凝粹神襟超曠量寬而不入麗  
滓理當而不留枝葉行治古之道爲君子之儒溫然玉容  
流競斯遠絜矩以居正開誠以納忠起文章之廢滯通天  
下之和惠內則褒美良能塞邪枉之路外則銷鑠災患寧  
黔首之艱廣予聰明宏益良厚言念報禮發乎深衷爰加

書圃之職用飾賢人之光寵靈斯重汝其敬之可兼宏文館大學士餘如故

命李晟家編附屬籍制

夫定社稷濟生人存不朽之名垂可久之業者必報以殊常之寵待以親比之恩與國無疆時惟茂典故奉天定難功臣太尉兼中書令上柱國西平郡王食實封一千五百戶贈太師李晟間代英賢自天忠勇邁濟時之宏算抱經武之長材貫以丹誠協于一德嘗遭屯難之際實著戡定之功鯨鯢既殲宮廟斯復眷茲勲伐則旣褒榮永念天步



之夷載懷邦傑之力是加崇於往烈爰協比於後昆睦以宗親將予厚意其家宜令編附屬籍

授烏重允河陽節度使制

門下鎮衛甸服控臨河津當五達之要衝主三軍之號令自頃選任多用勲勤必爲忠良乃稱獎擢昭義軍節度右廂都押衙兼馬軍都知兵馬使同州節度副使銀青光祿大夫檢校太子賓客兼潞州大都督府左司馬御史中丞上柱國張掖郡開國公烏重允稟潔白之性抱堅貞之資在涅不緇凌寒益茂承家得孫吳之術許國慕辛李之風

固已業擅戎韜聲滿軍府乃者山東振旅河右致誅守臣  
習非浸以成過事君不信撫衆無恩言多隱欺政務苛刻  
孤我委遇自虧功名士心咸忿其驕矜人力頗怨其凋盡  
雖趣召而有命蓋羣情之不容惟爾跡在轅門屬當此際  
一言秉禮百衆無譁居常表持重之難臨事見知幾之勇  
況地當師次營壓虜塵人情素悅而易從軍令旣明而自  
戢眷茲諒實可委蕃垣必能同士伍之衣食知黎元之病  
苦繼前政之風躅爲將來之表儀是用拜之壇場授以旌  
鉞命副相之崇秩牧覃懷之舊封式佇嘉猷用報明獎夫

行高則名著事舉則功存立政在初爲仁由己無或墜替  
欽承寵光可使持節懷州刺史御史大夫充河陽三城懷  
州節度營田等使散官勳並如故主者施行

復王承宗官爵制

夫蓋之如天容之如地王者之盛德叛而伐之服而捨之  
魯史之明義所患教化之未宏不患威令之不振所患忿  
懷之不當不患臣妾之不恭逐稔惡以彰典刑納忠誠以  
滌瑕釁糾慝宥罪其在斯乎朕嗣守丕圖虔奉先訓明有  
所未燭信有所未孚德罔洽人而懲法度之未一道靡化

物而慮風俗之未齊頃者誤於知人因以動衆雖亂是用  
長俾投於荒而靖以自思敢愴其過故太尉中書令武俊  
嘗拔艱危有大勲力重以親戚連其子孫壯容圖於綵績  
武烈書於鍾鼎十代之後尚延其寵渥四海之內豈利其  
土田我之初心蓋不如此盧從史首獻章表深陳便宜乃  
心頗類于向公如流遂昧於進熟乃割二郡別爲一鎮付  
其密親以示無外而承宗不諭朝旨遂干國章以至於斯  
事豈得已既而將帥同德干戈四臨幽薊以節制之衆收  
城池易定以雄猛之師獻俘馘火則方燎天其可逃然而

大兵所罹庶物皆賴農桑遂廢於壟畝老幼咸膏於鋒鏑  
爲之父母深用憫然王承宗困而能通迷而斯覆冒於白  
刃貢以赤誠仰日月以激於中腸罄封部而誓於後效賦  
奉其常數官奉其闕員以闔境之性命祈肆赦之恩澤我  
亦思省至於再三違命而用刑蓋有常憲順命而赦罪是  
亦前經寰海之饒寧私於數縣之地雨露之溥豈遺於一  
境之人加恩俾復其土疆改過是還其官秩其王承宗特  
宜洗雪依前起復雲麾將軍守左金吾衛大將軍員外置  
同正員檢校工部尚書兼鎮州大都督府長史御史大夫

上柱國充成德軍節度管內支度營田等使鎮冀深趙德  
棣等州觀察處置使成德軍將士官爵實封等一切如舊  
待之如初諸道行營將士等皆賈雄心爭輸忠力以戰則  
勝以攻則摧加以跋涉道途暴露原野各宜賞級仍并歸  
還宜共賜物二十八萬四百二十端匹並令度支隨便近  
即時支遣仍令糧料使與本軍計會豐厚宴設於戲帝王  
作兵以輔文德雷雨施澤亦酌人情況乎忠烈之遺勲親  
之後每稱破敵嘗用愧懷聞覆衆而增傷覽捷書而興歎  
一夫不獲尚泣於前王百姓何辜罹禍於茲日雖爲彼制

孰非吾人事苟便時朕寧屈己庶當修政思理推誠致和  
奉天地之心大祖宗之業姑以濟物豈務申威虞帝之征  
載示兩階之舞殷王之網式宏三面之仁惠此方隅置於  
安靜凡百多士宜諒予懷

授權德輿禮部尚書同平章事制

門下夫宰相之任上以代天工輔佐之宜下以立人極變  
調之理闕爰得忠正方膺股肱正議大夫守太常卿上柱  
國襄武縣開國侯賜紫金魚袋權德輿器度端實智資通  
敏學成師法文爲國華素履常踐於貞方黃中允合於易

簡自出入清列茂著嘉聲名利無屑於中懷風雨不移其  
常性驥馱之質常識於遠途鸞鳳之姿宜巢於阿閣期於  
致理推之至公寵以春卿掌我樞務輔天地之德俾化及  
清寧導陰陽之和使物靡疵癘予違汝弼言無面從君可  
臣否事已心同用佇宏美式副虛懷可守禮部尚書同中  
書門下平章事散官勲封賜如故

授李吉甫中書侍郎平章事制

輔弼之重邦家所屬寄深垣翰則外撫諸侯望切股肱則  
入熙庶績迭居其任厥惟舊章前淮南節度副大使知節



度事管內支度營田觀察處置等使金紫光祿大夫檢校  
兵部尚書兼中書侍郎同中書門下平章事揚州大都督  
府長史上柱國趙國公食邑三千戶李吉甫宏經遠之才  
研極深之慮脫落細故洞開中懷文稽典暮學升堂室洎  
司我密命言屢表於獨明參予袞職道每彰於孤直貢其  
誠節竭以公忠墜典載張彝倫攸斂輔予不逮懷之豈忘  
曩以江淮大都吳楚鎮歲屬艱食人多愁聲是假全才  
用康疲俗下流水利不憚勞心故蠹以長塘瀦其天澤變  
烏鹵爲稻粱之壤致蒸黎有衣食之源吏守成規人無遷

志庶富之教既宣於封內輔相之宜俾及於天下顧茲重  
務屬於良臣去其外職之繁專以中樞之任至於別館良  
史之褒貶內殿集賢之清祕爰舉舊典式洽新恩無曠厥  
官往踐乃位可中書侍郎平章事兼集賢殿大學士兼修  
國史散官勲封如故

李藩守太子詹事制

爰立輔臣以熙庶績聿膺其任是亦難能至於明用捨之  
宜全始終之道茲惟大體寧忘予懷中散大夫守門下侍  
郎同中書門下平章事兼宏文館大學士上柱國賜紫金

魚袋李藩早以學行聞於縉紳洎升朝端克慎素履頃者  
拔於非次列在鈞衡是宜直己以佐時匪躬而納誨用副  
明獎越於常倫而授任已來再逾年序夙夜之勤雖著弼  
諧之效未孚將何以允至公之求成天下之務宜輟黃樞  
之重尚居端尹之崇爾其勉之式謂優禮可守太子詹事  
散官勲賜如故

貸京畿義倉粟制

朕聞王者之牧黎元也愛之如子視之如傷苟或風雨不  
時稼穡不稔則必除煩就簡惜力重勞以圖便安以阜生

業況邦畿之內百役所叢雖勤卹之令亟行而供億之制猶廣重以經夏炎暵自秋霖淫南畝虧播植之功西成失豐登之望內乏口食外牽王徭豈惟轉輸之虞慮有餒殍之患斯蓋理道猶鬱和氣未通永言於茲良所咎歎宜加惠貸式示誠懷比者每令折糴本以使人爲意今田穀所收其數既少必恐徵納之後種食不充其京兆府宜放今年所配折糴粟二十五萬石如百姓有粟情願折納即於時價外特加優饒與納仍令當處收貯委度支逐便支用今春貸百姓義倉斛斛屬歲旱歉須議優矜宜令所司容

至豐收日徵填京兆府從元和五年已前諸縣租稅有逋懸錢在百姓腹內者放免其百姓職田數額甚廣近緣水潦道路不通計搬運腳價所費猶倍務令寬濟使其安存其破損外職田粟宜令逐近貯納仍委度支隨便支用其職田粟送城腳價亦宜放免百官今年本分職田粟據損數外宜令於太倉請受其草及水田租旣緣城中無可迴給即宜據損數外準舊例令今年畿內田苗應水旱損處有無聞至今檢覆未定又屬霖雨所損轉多有妨農收慮致勞擾其諸縣勘覆有未畢處宜令所司據元訴狀便與

破損不必更令檢覆其未經申訴者亦宜與類例處分朕以爲理之本在乎安人咨爾尹京宰邑之臣實惟親人阜俗之寄必當詢其疾苦奉我詔條恤隱爲心無怠於事罔或徇利以剋下吐剛而茹柔使閭井咸安惇嫠獲濟各勉忠效宜悉朕懷

封恩王等女爲縣主制

王者教化本於婚姻由親以理疏自內而型外故詩稱好合所以成子姓也禮有待年明其必及時也恭惟累聖之後子孫衆多教於公宮已知婦順而從人之義重擇配之

才難以茲兢兢久曠嘉禮況時方無事年及有行宜加祿  
邑之榮以俟御輪之吉言念於此惕然興懷思宏厚恩用  
協敦敘恩王等女六人可並封縣主仍委中書門下與宗  
正卿及吏部尚書侍郎計會諸親之內及常選之中精求  
其人副我誠意

授李絳中書侍郎同平章事制

門下司重柄者允屬於長才熙大猷者固資於端士朕纘  
承鴻緒撫有萬邦夙夜祗勤懼遠於道故每注意宰輔勞  
懷夢想誠以得失之效邦家所繫疇若僉論簡予深衷必

惟其人是舉成命朝議郎守尚書戶部侍郎驍騎尉賜紫  
金魚袋李絳質秀珪玉文含采章抱器挺生居貞犗立有  
史魚秉直之操勵山甫匪懈之誠忠孝兩全學識兼茂清  
標可以範雅俗正氣可以肅羣倫頃自周行俾參密命動  
由於義知無不爲蹇蹇懷匡濟之心孜孜陳遠大之略言  
無隱避居則靜專貫於初終其道一致地卿之貳爰委典  
司理財先示於簡廉利物每懲於聚斂經通立制器用彌  
光臺閣之間鬱有公望是宜權衡百度宰理庶工允副具  
瞻掌我樞密於戲予欲驅人俗以躋富壽感人心而致和



平爾尚修明憲章宣布德澤必寬大其志無皦察爲公恒  
其道以秉彜裕其體以臨下各任以職無忘陳平之言苟  
便於人勿憚蕭何之請敬茲寵擢其懋戒哉可朝議大夫  
守中書侍郎同中書門下平章事勲賜如故主者施行

欽定全唐文卷五十七目錄

憲宗 二

賑貸京畿百姓制

許杜佑致仕制

授田興魏博節度使制

宣慰魏博制

貶楊歸厚國子主簿制

權德輿守禮部尚書制

復授武元衡門下侍郎平章事制

李絳守禮部尚書制

賑給京畿百姓制

授張宏靖刑部尚書平章事制

追贈甄濟祕書少監制

授劉敦儒兵曹參軍分司東都制

曉諭淮西制

加張宏靖中書門下平章事制

授韋貫之尚書右丞平章事制

討吳元濟制

授裴度中書侍郎平章事制

授張宏靖太原節度使制

授韋貫之中書侍郎平章事制

欽定全唐文卷五十七

憲宗 二

賑貸京畿百姓制

門下王者布德行惠必順天時發廩賑乏蓋循舊典朕君  
臨寓縣念切黎元思欲咸致其安各阜其業事關恤下政  
在使人予無愛焉斯爲大本而旬服之內比年豐穰一歲  
不登遂至艱食豈非穀下賦役經制猶繁物力所資凋耗  
已甚靖言於此愧歎良深今春陽發生田事具飭苟迫於  
歉乏不能自存而耕植頓虧秋成何望所以特加恩賚蠲

彼徵求庶農桑之及時俟薹麥之方稔式當和煦之候載  
示憂勤之心我其永懷俾厚生殖京畿百姓宜共賑給粟  
三十萬石內八萬石以京兆府常平義倉粟充其餘以太  
倉粟充支給比者田穀致損芻藁隨之今已過時益難濟  
辦其并職田草共一百一十五萬束並宜放免又有常賦  
錢穀蠲放之餘貧弊者多慮難輸入欲令寬息須有憂矜  
其京兆府欠去年兩稅青苗等錢二萬一千八百貫欠秋  
租雜斛斗及職田粟五萬三千三百石並宜放免元和六  
年春賑貸京畿百姓義倉粟二十四萬石亦宜放免朕誠

意靡達黎人未康憂積於衷鑒寐增惕爰自去歲以迄於  
今存救之恩屢降明詔乃眷長吏職惟親人爾其極慮撫  
綏指陳利病將我惠澤被於鰥孤叶於便宜無使勞擾故  
茲示諭當悉朕懷

許杜佑致仕制

宣力濟時爲臣之懿躅辭榮告老行己之高風況乎任重  
公台義深翼贊秉沖讓之志堅金石之誠敦諭旣勤所執  
彌固則當遂其衷懇進以崇名尚齒優賢斯王化之本也  
金紫光祿大夫守司徒同中書門下平章事兼充宏文館

大學士充太清宮使上柱國岐國公食邑三千戶杜佑巖  
廊上才邦國茂器蘊經通之識履溫厚之姿寬裕本乎性  
情謀猷彰乎事業博聞強學知歷代沿革之宜爲政惠人  
審羣黎利病之要由是再司邦用累歷藩方出總戎麾入  
和鼎實聿膺重寄歷事先朝左右朕躬夙夜匪懈命以詔  
冊登之上公肅恭在廷華髮承弁茲可謂國之元老人之  
具瞻者也朕纘承丕業思宏景化選勞求舊期致時邕方  
伸引翼之儀遽抗懸車之請而又固辭年疾乞就休閒已  
而復來星館屢變有不可抑良用耿然永惟古先哲王君



臣之際臣有耆艾以求其退君有優賜以徇其情乃輟鄧禹敷教之功仍增王祥輔導之秩俾養浩然之氣安於敬止之鄉庶乎頤神葆和永綏福履仍加階級以厚寵章其惟敬哉茲謂全致可光祿大夫守太保致仕宜朝朔望

授田興魏博節度使制

經邦制理先務於安人秉義納忠諒存乎體國其有堅持正性動合衆心才當與能善足垂勸則宜荷推轂之寄爲分閫之臣建侯貞師宣我利澤魏博軍步射都知兵馬使同節度副使檢校祕書監兼御史中丞沂國公田興深明

有融忠孝是力介若金石通乎弛張效用思齊於昔賢潔誠期報於君父生此王國跡淪戎藩逢時乃彰會節有立日者元臣即代裔子幼年小人任事以作威諸將屏息而增懼政理滋紊刑章亟乖羣臣危疑幾致顛越朕用憂閔方圖輯寧而興任在轅門深惟大體義勇斯奮奸雄伏辜士心所歸不令而肅征鎮安固厥庸茂焉旣而保貴胄之家將致上國全故帥之績求復中軍表章屢疏情懇備至以勲則特異以義則可觀周旋令圖蓋有餘裕朕高懸爵命以待能賢嘉爾殊勞允宜懋賞晉軍謀帥卻縠嘗學於

詩書漢將議功竇融實冠於名節魏郊巨鎮河上奧區杖  
鉞可以宣國威觀風可以率彝典習俗至於丕變疲毗俟  
而汔康佇光冊書用寄心膺榮級繼登於七命顯秩超踐  
於六卿仍兼副相之雄以重元戎之寄服茲休命其懋戒  
哉可銀青光祿大夫檢校工部尚書兼魏州大都督府長  
史御史大夫充魏博等州節度管內支度營田觀察處置  
等使勲封如故

宣慰魏博制

奉君親竭忠孝人倫之大端也賢智所以盡心賞功勞懋

名節國家之急務也。皇王所以致理，朕嗣服丕業，恭臨萬邦。每念政之未孚，化有不暨，怵惕惟厲，載履於懷。嘗以爲肖質稟靈，皆思嚮善，亦在甄明撫導，推示至誠，樹績必使其光揚，罹患必圖其安緝。永言及此，終食豈忘魏博大藩東夏，雄屏軍戎，勇於見義，黎庶懷於有仁。自中原始，兵革之虞，河朔爲用武之地，抱才器者或感恩而盡力，申節効者果因事而彰明。時將大寧，斯獲予志。近田季安薨，謝其子幼童，姦邪憑依，妄肆威福。一境危慄，懼致覆亡。比屋凋傷，疲於杼軸。田興仗義，奮發翦去，憐人大安，方隅屢獻忠

懇達三軍奉上之志激千里望闕之誠誓遵典彝丕變舊俗忠諫指切感於朕心是用特授旌旄俾靖封略言念將士同德叶謀守正如金石之堅凌寒挺松柏之操垂令名於不朽示臣節於將來清風載揚丹款可鑒嘉尚歎息勞於寢興賞不踰時式示旌勸其管內百姓等身勞耕稼力竭征徭每念予懷用當憂憫宜令司封郎中知制誥裴度往魏博宣慰親諭朕意仍賜錢一百五十萬貫以河陽院諸道合進內庫綾絹綿等支送充賞給將士及六州縣百姓差科宜給復一年使之蘇息州縣之中或有殘破偏甚

者委田興逐便宜處分朕以布澤之時務從人欲好生之德期洽衆心魏博管內宜赦見禁囚徒其與田興協心立功大將及判官等委興具名銜聞奏當有甄升如有父母在別加優恤當道從前以來官吏將校等或忠義可嘉而刑戮濫及如有此色委田興條錄奏聞當加追贈如有家口見存宜厚加優恤管內高年憫獨或天寶遺人夙霑皇化或孤獨廢疾不能自存委田興差官存問仍量給粟帛管內有清勤奉職爲衆所知者委田興具事蹟奏聞當加進改如身在邱園行義素著或才兼文武名節可稱亦委

田興具名聞薦贈太尉季安姻戚舊臣嘗任將相飾終之  
典宜示優崇其葬事委田興差官勾當禮物之閒務從周  
厚田懷諫在疚之初政出羣小因致軍府騷然不寧以其  
幼年有足矜憫待其到京之日一門量加存恤嗚呼聳善  
念功惟恐不及卹人厚下惟恐不豐庶洽雍熙遂橐弓矢  
爲仁繇己其道信然樹德務滋在乎終始凡百多士宜悉  
朕懷

貶楊歸厚國子主簿制

楊歸厚頃以詞藝擢於諫垣自屬班行頗修職業但列於

清近當慎威儀以婚姻之私假借公館表章上獻慢黷則多俾移秩於國庠仍分曹於雜邑可國子主簿分司東洛

權德輿守禮部尚書制

文昌六官宗伯掌禮選授之重自昔攸難非夫台衮之臣分全於終始縉紳之義素洽於羣倫則無以允是優崇膺茲名秩正議大夫守禮部尚書同中書門下平章事上柱國扶風郡開國公權德輿奧學雄詞虛襟曠度稟中和之氣宏信厚之規夙彰厥猷歷踐清貫乃者徊翔省閣祗服大僚咸推鎮俗之風遂致濟川之望朕永惟理本宵旰在



懷嘗期獻納之功深屬弼諧之任爰徵僉論俾列鼎司勤  
勞亟涉於歲時謙挹每形於造次是用委春卿之職輟樞  
務之殷任事呈能庶先會府帥屬而理汝往欽哉可守禮  
部尚書

復授武元衡門下侍郎平章事制

門下邦國之興將相是資選衆而舉思賢俾乂故有台臣  
外撫宣力已靖於四方袞職迭居懋功復凝於庶績允茲  
崇踐爰屬上才前劔南西川節度副大使知節度事管內  
支度營田觀察處置統押近界諸藩及西山八國雲南安

撫等使銀青光祿大夫檢校吏部尚書兼門下侍郎同中書門下平章事成都尹上柱國臨淮郡開國公食邑二千戶武元衡粹厚端莊簡易常壹有誠明之道以致用有宏茂之略以佐時貞方自得於性術操尚不愆於風雨加以懿文合雅聚學承師通禮樂刑政之源達古今治變之要厯登華貫休聞穆然泊處鈞衡中立不倚致君思堯舜之盛修職以邴魏爲宗翼戴之勤夙夜彌亮彝倫攸敘鼎飪載和益部大藩比仗兼濟而能布宣威惠撫莅蠻髦縣道輯寧疲黎安息推心而下皆率附正己而人自嚮方臨之

累年理有殊等朕以出納王命緝熙帝圖總庶官之職業  
爲百度之扃鍵惟此重任屬於黃扉分憂遂輟於殿邦具  
瞻再歸於碩望爾尚行之以中正煦之以和平毗於一人  
膏潤天下祇膺禮命無替徽猷可守門下侍郎同中書門  
下平章事兼崇元館大學士充太清宮使

李絳守禮部尚書制

輔相之任所貴乎納忠進退之宜實重於申禮其有以勞  
奉國以疾固辭聿懷謙讓之風是舉優崇之典朝議大夫  
守中書侍郎同中書門下平章事上柱國高邑縣開國男

食邑三百戶賜紫金魚袋李絳端莊秉彝亮直循道抱凌  
寒之勁節標肅物之貞規嘗以懿文參於內署亦以公望  
貳於地卿竭其器能茂著宦業泊居袞職左右朕躬遠慮  
必陳讜言無隱竭致君之志宏濟俗之方確然真心鬱有  
休問而步履嬰疹趨侍爲難披誠上聞稽首求免乃眷毗  
倚久之未從星霜屢遷哀懇彌激宗伯秩禮時惟大寮宜  
從喉舌之班用輟鹽梅之寄庶因清簡俾遂頤真膺茲寵  
章敬服爾命可守禮部尚書散官封賜如故

賑給京畿百姓制

善爲國者務蓄於人百姓未康君孰與足其或時逢水旱  
念切憚糝於是而已責之恩行散利之典古今通範何莫  
繇斯朕恭己勵精以臨兆庶永言憂濟終食豈忘思俾萬  
邦同臻富壽而去歲甸服氣序愆和夏屬驕陽秋多苦雨  
三農爽候五稼不滋比及收藏曾靡善熟如聞閭井之內  
儲備罕充產於地者旣微出於力者宜困旣牽公上之稅  
薦迫輸送之期循環歲時固亦勞止況羣司具列軍衛實  
繁供億之名制備存工役之科條未艾四方楨榦屬在京  
師念茲矜人良多愧歎今土膏方動東作其勤逋賦未蠲

糧餉何望宜加惠渥式俾厚生趨澤務農庶乎勸化姑示  
納隍之旨佇寬艱食之虞煦育順時義斯可取應京畿百  
姓所欠元和八年稅斛斗青苗錢稅草等在百姓腹內者  
並宜放免仍以常平義倉斛斗三十萬石委京兆府條疏  
賑給務及貧人如常平義倉不足即宜以元和七年諸縣  
所貯折糴斛斗添給應緣賑給百姓等委京兆差擇清幹  
官於每縣界逐處給付使無所弊各得自資近歲以來屢  
宏德澤邦畿千里田號上腴阜安疲黎亦在循政咨爾京  
邑長吏洎於宰字之官各宜叶心將我詔意戒之以擾授

之以仁宣示朕懷咸使知悉

授張宏靖刑部尚書平章事制

門下虞以爲盛猶咨五臣殷之用興亦賴三后朕勵精恭  
己十載於茲常以國鈞委之公輔務熙庶績敢怠旁求思  
欲左右有人在廣股肱之任歷選列辟洎於藩維冀獲賢  
能俾匡正道爰茲所命允屬至懷河中晉絳慈隰等州節  
度支度營田觀察處置等使正議大夫檢校禮部尚書兼  
河中尹御史大夫上柱國高平縣開國子食邑五百戶賜  
紫金魚袋張宏靖德稟精微器含沖用溫恭諒實明允克

誠素推君子之風雅有大臣之體蘊積稽古之學發揮經  
緯之文嘗司朕言動叶謨訓歷踐清貫具揚淑聲爰統方  
州載膺節制奉法遵制在公忘私人無不懷績用丕茂予  
欲正百工之理成太平之階若臨巨川以重舟楫是用命  
爾列於中台每念臣鄰之規以貞棟崇之吉少翁積慶嗣  
德漢廷文子勤身繼匡晉室爾惟朝夕納誨以翊朕躬是  
資袞職之勤式重緇衣之美仍帥司寇之屬俾靖臯陶之  
刑懋宣厥猷往踐於位可守刑部尚書平章事散官勲封  
如故



追贈甄濟祕書少監制

存樹風節謂之立名歿加褒飾所以誘善故朝散大夫試  
祕書省著作郎兼侍御史甄濟昔以文雅見稱當時嘗因  
辟召亦佐戎府而能保堅貞之正性不履危機覩逆亂之  
潛萌不從脅汙義聲可傳於竹帛顯贈未賁於松楸藩方  
上陳允叶彝典追加命秩以獎忠魂可贈祕書少監

授劉敦儒兵曹參軍分司東都制

孝子劉敦儒生於儒門稟此至性王祥篤行起孝敬而不  
移曾參養志積歲年而罔怠用宏勸獎宜服官常分曹洛

師俾遂私志可守左龍武軍兵曹參軍分司東都

曉諭淮西制

朕嗣膺寶位於茲十年每推至誠以御方夏庶以仁化臻於太和宵衣旰食意屬於此今淮西一道未達朝經擅自繼襲肆行寇掠將士等迫於受制非是本心思去三面之羅庶遵兩階之義宜以山南東道節度使嚴綬兼充申光蔡等州招撫使仍與隣道將帥等即同糾率共申曉諭其淮西將士官吏等如有歸國者即量其高下便授職任仍具奏聞仰超授官爵縱舊有罪犯一切無問吳元濟如東

身歸朝亦當棄瑕錄用其百姓有歸投者仰便給糧食仍與田宅務加存恤使其安堵事平之後淮西將士宜共賜錢二百萬貫百姓給復三年詔書所不該者嚴綬量其所宜條流奏聞庶盡綏懷之義以申生育之恩若尚執迷不能遷善至於問罪自有常刑宜以誠懷使其知悉

加張宏靖中書門下平章事制

門下贊天地之化阜成萬物正邦國之紀康於羣生夢寐旁求精誠上達況乎明誠以久嘉猷日聞股肱之任耳目所注具官宏靖實天生德惟嶽降神端方靜深信厚溫霽

質抱荆山之璞光含魏國之寶錯爾素履穆然清風出備  
爪牙總近關之紀律入膺喉舌練中臺之法制從容宰輔  
密勿鼎司誠惟在公慮必經國濟川舟楫人望具瞻和羹  
鹽梅朕志先定宜登右弼之任用正中台之曜纂乃祖考  
光於家邦於戲天工人代予違汝翼必當悉乃力同乃心  
役天下之才以貞百度通天下之志以佐萬幾唯直道是  
行唯讜言是進內懷親附拯黎元之方困外思鎮撫偃兵  
甲於將興勿優養以崇名無逡循而避事對揚成命時乃  
之休可守中書門下平章事

授韋貫之尚書右丞平章事制

門下弼成大化參敘彝倫克光元首之明其服股肱之任  
朕所以不自暇逸務求賢能式重舟楫之才以宏經濟之  
道疇若予志僉諧乃公中大夫守尚書右丞上輕車都尉  
賜紫金魚袋韋貫之清明在躬禮樂之器蘊珪璋特達之  
德茂廉正博雅之規靜而知微動必有守凡踐列位備聞  
嘉猷當官而行臨事能斷道可鎮於風俗望彌積於朝倫  
是宜和靖陰陽紀綱邦國命作心膂列於台階夫能慮四  
方揆百事愛利萬物辨論羣材示公忘私時乃之職而況

圖靖藩服繫在廟謨爾惟順下以訓人奉上以宣力因衆  
功而致用熙衆志以爲心朝夕獻可否之誠經綸底文武  
之績祇膺厥命勿懈於時可守尚書右丞平章事散官勲  
如故

討吳元濟制

天地之化由肅殺而成歲功帝王之道以威武而輔文德  
朕祇荷鴻業撫臨庶邦務先含宏每慎征戰俾懷仁者有  
耻且格畏罪者見善即遷而或昏迷不恭告命不及固興  
勃亂之孽自速原野之誅除害正刑國有彝典吳元濟逆

絕人理反易天常不居父喪擅領軍事諭以詔旨曾無敬  
恭熒惑一方之人迫脅三軍之衆以其父少陽常經任使  
爲之軫悼命申奠祭臨遣使臣凌虐封疆遂致稽阻絕朝  
廷之禮意忘父子之恩情旋又掩襲舞陽傷殘吏卒焚燒  
葉縣騷擾閭閻恣行寇攘無所畏忌朕嘗念賞延之義又  
重傷藩帥之門尚欲納於忠順之途處以顯榮之列未能  
飭法猶爲包荒再以詔書俾申招撫而蠱毒滋長姦心靡  
悛壽春西南又陷鎮柵窮凶稔惡縱暴挺災覆載之所不  
容人神之所共棄良非獲已致此興戎蓋以方伯連帥同

請討除伐罪弔人故茲申命宜令宣武忠武太原武寧淮南宣歙等兵馬合勢山南東道及魏博荆南江西劔南東川等道兵馬與鄂南計會東都防禦使與懷汝鄭節度及劔南義成軍兵馬犄角相應同爲進討吳元濟舊有官秩宜並削除大軍旣臨計即戡殄嗟我淮右之衆本爲勤王之師雖是脅從頻已昭洗念此勲力未嘗弭忘適罹狡童又此誑誤心懷忠順迫在兇威苟能率誠即可收效其淮西將士有能梟斬兇渠者先是六品已下官授三品正員官其先授五品已上官者節級昇進仍與實封五百戶莊



宅各一區錢二萬貫如能率所管兵馬以城鎮來降者並  
超三資與改官仍與實封二百戶錢一萬貫以一身降者  
亦與改轉仍賜錢帛諸道應赴行營將士如有斬元惡者  
亦準此處分吳元濟如能束身歸朝並與洗雪若不能改  
過罪止其身其餘汙脅一切不問接賊界州縣百姓軍興  
已來供饋繁併言念疲瘵良增憫然元和九年兩稅斛斛  
錢物等在百姓腹內者并十年夏稅並宜放免其有城鎮  
將士百姓守節拒賊身死王事者各委長吏優給其家仍  
具事跡申奏當加褒贈并賜錢帛仍與一子官三州百姓

莫匪吾人諸軍所至不得妄加殺戮焚燒廬舍據奪財產  
并有拘執以爲俘馘事平之後給復二年三州內有自置  
義營堡柵王師所至能相率來降各加酬獎時當春候務  
切農桑應緣軍務所須並不得干擾百姓如要車牛夫役  
及工匠之類並宜和雇情願仍給優價賊平之後應立功  
將士並與超資改官節級賜物於戲朕率理道靡敢荒寧  
思致中和以康億兆而德之寡薄化未昭宣爰用甲兵良  
深媿歎顧非重武其在止戈宣示中外咸令知悉

授裴度中書侍郎平章事制

門下輔相之任重作予股肱經濟之才難注人耳目苟非  
慮周物表識洞事先則何以出納中樞平章大政詢於時  
論僉曰汝諧朝議郎守御史中丞兼尚書刑部侍郎飛騎  
尉賜紫金魚袋裴度勁直循道清通秉彝文融菁華行茂  
枝葉居然廊廟之器出於領袖之門西掖司言南臺執憲  
常懷遠略屢告嘉猷實宣力以徇公況外身而憂國霜雪  
無改雷風有恒朕欲旋觀其能用試於事俾歷戎閫載馳  
使軒王澤渙汗以遐宣軍情密勿而上達將議抽擢因懼  
震驚崇道德之藩籬士有致命資忠信之甲冑兵無容刃

人具瞻爾天方賚予昆命於龜爰立作相爾其展四體堅  
一心廣其道以用賢厚其風以易俗五兵未戢爾惟保定  
武功百姓未康爾惟勤恤人隱臨事必斷當官而行齊台  
階於底平補袞職之有闕光膺慎選其戒之哉可朝議大  
夫守中書侍郎同中書門下平章事勲賜如故

授張宏靖太原節度使制

門下授鈇鉞之賜其惟爪牙掌管籥之司允歸心腹況乎  
天兵作鎮王業成都全晉山河陶唐風俗外以威懷七狄  
內以承衛二京操節制戎帥之權兼澄清列郡之寄訓齊

五校表率一方歷選元僚無逾上相中書令張宏靖高蓋垂慶大珪含章和順在中莊敬發外翼翼有致君之道兢兢懷許國之忠言觀器能早授方任風謠果洽於分陝膏潤實彰於近關洎登爲鼎臣輔我袞職出納萬務清明一心宏宣遠猷慎守成式夢帝所賚伊人是瞻朕以龍山之前卒乘殷會鴈塞之上稽胡雜居求明略以拊循資盛名而鎮定是用輟於鈞軸授以節旄崇高超列於天官密勿遙參於台席敬聽後命載揚先聲在貞元初乃考成肅公弼諧德宗以敷景化肆予嗣位惟爾業官匪惟勤勞於我

邦茲亦光輝於爾室於戲入而惟輔出而爲藩行思永圖  
勿替舊服可檢校吏部尚書同中書門下平章事充太原  
節度使

授韋貫之中書侍郎平章事制

門下地拱宸居任膺宰執宣明大號佐佑丕圖失其道而  
庶事靡陳得其道而彝倫攸敘成吾柱石在乎鈞衡況今  
戎役方殷廟謀爲切利用旣彰於歷試崇名宜允於僉諧  
右丞韋貫之代秉廉清天資貞白奇文包於五色茂德體  
於千鈞含和抱公居易求己徊翔禮闈堅明以辨其妍媸

網轄仙臺密靜克修其班制動有直氣居無流心泊權登  
袞職參任樞務平章庶事屢入三臺遠猷是經中立不倚  
元成之慶靈斯集山甫之恭勤日聞俾重輝於相門爰正  
位於台座於戲宰相者實執人柄以爲國植化有未孚於  
休物有不遂其性佇爾高議副予虛懷予欲惠於兆庶爾  
思均賦之宜庸觀在位式序品物咸亨鼓時風以淳厚吾  
人流王澤以光昭乃辟服我成命仰而行之可守中書侍  
郎平章事